



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
24 Outubru 2022

Ministériu Interiór no UNDP fornese facilidade ba VPU
JSMP apresia no rekomena atu kontinua tau-matan ba VPU iha teritóriu tomak

Iha tinan ida ne'e, Ministériu Interiór liuhusi Komandu PNTL (Polísia Nasionál Timor-Leste) entrega kareta ba iha Unidade ba Ema Vulnerável (VPU)-PNTL iha kada munisípiu hodi apoia sira nia serbisu. Alende ne'e, UNDP liuhusi Programa Spotlight serbisu hamutuk ho Governu Timor Leste, harii uma foun ba VPU iha Munisípiu Maliana no Vikeke inklui apoia ekipamentu sira hanesan laptop, printer no seluk tan no entrega ona ba PNTL.

“JSMP apresia aas Ministériu Interiór no UNDP liuhusi Programa Spotligh ba apoiu sira ne'e. Apoiu sira ne'e ajuda tebes unidade ne'e iha atendimentu ba kazu sira hanesan abuzu seksuál ba menór, violasaun seksuál, violénsia doméstika ka kazu sira ho natureza violénsia bazeia ba jéneru. Maibé JSMP kontinua husu ba Estadu no Ajénsia Internasionál hanesan UNDP atu kontinua tau-matan ba VPU sira iha teritóriu tomak. Tanba tinan naruk ona unidade ne'e infrenta dezafiu oin-oin hanesan menus rekursu umanu (kuantidade, qualidade), facilidade no ekipamentu sira hanesan transporte, komputadór, printer, tinta no seluk tan,” dehan Sra. Ana Paula Marçal, Diretora Ezekutiva JSMP.

VPU rasik harii iha tinan 2001 ho objetivu fó atendimentu ba vítima kazu sira ho natureza violénsia bazeia ba jéneru no unidade ida ne'e estabelese iha munisípiu hotu ho edifísiu ida iha kada estasaun polísia munisípiu. Maibé durante tinan barak unidade ne'e infrenta dezafiu oinoin, hanesan pesoal VPU iha munisípiu sira la sufsiente hodi atende kazu ne'ebé barak no rotasaun ba pesoal iha unidade ne'e mós fó impaktu ba iha atendimentu kazu sira ho di'ak no qualidade. Nune'e mós ekipamentu sira hanesan komputador, tinta ba printer no facilidade sira hanesan transporte menus tebes nune'e iha situasaun balun VPU sira tenke dezenraska la'o de'it to'o fatin akontesimentu hodi atende kazu sira ne'ebé comunidade sira hasoru.

Estadu tenke tau-matan liuhusi fornese fasilidade, ekipamentu no rekursu sufsiente iha unidade ne'e nune'e unidade ne'e bele serbisu di'ak liutan hodi atende kazu sira ne'ebé rekere prova sufsiente liuliu kazu sira ho natureza violénsia seksuál, rekere serbisu extraordináriu no rekere kapasidade di'ak iha atendimentu sira tanba envolve labarik no feto sira ne'ebé dalabarak infrenta problema psikolójia, presaun, moe no ta'uk atu ko'alia sai sira nia kazu.

Alende ne'e, papél importante seluk husi unidade ne'e mak halo kolaborasaun no koordinasaun ho parseiru sosiedade sivíl sira iha fó assisténsia ba vítima. Ho nune'e bainhira VPU hasoru dezafiu sira iha atendimentu balun, sosiedade sivíl sira bele fó apoiu maibé tanba parseiru sira rasik mós hasoru dezafiu hanesan menus rekursu tantu rekursu umanu, transporte no finanseira nune'e labele kobre munisípiu hotu ka área hotu.

JSMP observa katak mezmu VPU sira hasoru dezafiu oinoin iha tinan barak nia laran, maibé VPU sira kontinua hala'o serbisu inklui harii kooperasaun di'ak tebes ho parseiru sira iha atendimentu kazu sira.

Bazeia ba dezafiu sira ne'ebé VPU infrenta, JSMP kontinua rekomenda ba :

1. PNTL atu koloka tan membru iha VPU kada munisípiu nune'e sira bele iha rekursu natoon hodi fó atendimentu ba kazu sira ne'ebé kada loron aumenta.
2. PNTL no parseiru sira kontinua hasae koñesimentu ajente polísia sira hotu liuhusi formasaun sira kona-ba enkuadramentu legál sira hanesan Kódigu Penál, Kódigu Prosesu Penál, Lei Kontra Violénsia Doméstika, Lei Tráfiku Umanu, inklui asuntu direitus umanus, igualdade jéneru no Violénsia Bazeia ba Jéneru (VBJ) nune'e bainhira koloka ba iha unidade ida ne'e, sira iha ona koñesimentu báziku kona-ba VBJ.
3. PNTL atu inklui orsamentu sufsiente iha Proposta Orsamentu Jerál PNTL nian nune'e bele hatan dezafiu sira ne'ebé VPU infrenta
4. Parlamentu Nasional no Komisaun B ne'ebé kobre asuntu seguransa no defeza atu aprova orsamentu sufsiente ba apoia serbisu VPU sira

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>